

施食通覽

四明石芝沙門 宗曉 編

施餓鬼食文

文忠公蘇 軾

鬼趣多餓，仁者當念濟之。宜以錫或鐵為斛斗，受一、二升量，每晨，取炊熟淨飯滿斛蓋覆，著淨處，至夜重餾，令熱取透，并淨水一盞。能不食酒肉固大善，不能，當以淨水漱口，誦《淨口業真言》七徧，燒香呪願，云：

「奉佛弟子(某甲)，夜具斛食淨水，供養一切鬼神。」

又誦《般若心經》三卷，《破地獄偈》三徧，便呪願云：

「願此飯此水，承佛慈力，下承(某甲)福力、願力，變少為多，變粗為細，變垢為淨。願諸佛子食此水飯，頓除飢渴，諸障消滅，離苦得樂，究竟成佛。」

言已，以水掬飯，三分之一散置屋上，餘者不妨以食貧人，水即散洒之。要在發平等、慈悲、無求心耳。

【經文資訊】卍新續藏第 57 冊 No. 0961 施食通覽